

Na osnovu člana 56. stav 2. Zakona o organizaciji organa uprave u Federaciji Bosne i Hercegovine („Službene novine Federacije BiH“, broj: 35/05), u vezi sa članom 176. stav 6. Zakona o carinskoj politici Bosne i Hercegovine („Službeni glasnik BiH“, br. 57/04, 51/06 i 93/08), i članom 2. tačka 16. i 22. Odluke o postupku ostvarivanja prava na oslobođanje od plaćanja carine pod posebnim uslovima („Službeni glasnik BiH“, br. 19/05 i 52/05), federalni ministar kulture i sporta d o n o s i

P R A V I L N I K

o postupku davanja mišljenja i potvrda za korištenje carinske povlastice u postupku oslobođanja od plaćanja carine

I - Uvodne odredbe

Član 1.

Ovim pravilnikom regulišu se postupak i uslovi za izdavanje mišljenja i potvrda koje izdaje Federalno ministarstvo kulture i sporta -Federalno ministarstvo kulture i sporta (u daljem tekstu: MInistarstvo), u postupku oslobođanja plaćanja carina u oblastima koje pokriva.

Izdato mišljenje, odnosno potvrda služi kao dokument za korištenje carinske povlastice, koju izdaje nadležni carinski organ.

Član 2.

Mišljenje, odnosno potvrda je akt koji se izdaje na temelju pisanog zahtjeva zainteresovane stranke.

Mišljenje, odnosno potvrdu donosi federalni ministar kulture i sporta (u daljem tekstu: Ministar), na prijedlog Komisije za carine (u daljem tekstu:Komisija).

Član 3.

Komisiju imenuje ministar.

Komisija se sastoji od predsjednika, dva člana i po jednog pomoćnog člana.

Komisija donosi poslovnik o radu.

Komisija radi u skladu sa zakonom, podzakonskim aktima, ovim pravilnikom i poslovnikom o radu.

II – Postupak izdavanja mišljenja

Član 4.

Mišljenje se izdaje na temelju zahtjeva za svaki predmet posebno, pod uslovima utvrđenim ovim pravilnikom.

Mišljenje sadrži: naziv i broj ministarstva, pravni osnov, predmet mišljenja (oznaku kategorije uvezene robe i podobnost robe za obavljanje određene djelatnosti korisnika povlastice, s obzirom na njegov pravni status), naziv podnosioca zahtjeva, klauzulu o plaćanju federalne administrativne takse, potpis ministra i štambilj ministarstva.

Komisija je dužna voditi evidenciju izdatih mišljenja sa slijedećim podacima:

1. Podnosilac zahtjeva
2. Predmet mišljenja
3. Redni broj i datum mišljenja
4. Priložena dokumentacija

Evidencija se vodi u posebnoj svesci, ovjerenoj brojem protokola ministarstva.

III – Uslovi za davanje mišljenja

Član 5.

Uslov za davanje mišljenja je dostavljanje potrebne dokumentacije uz zahtjev i to:

- a) dokaz o vrsti robe, radi kategorizovanja robe kao kulturološkog materijala, prema Odluci o listi obrazovnih, naučnih i kulturoloških materijala koji su oslobođeni od plaćanja carine („Službeni glasnik BiH“, broj: 34/05).

- b) dokaz o pravnom statusu korisnika povlastice, odnosno o registraciji kod nadležnog organa za obavljanje određene djelatnosti, radi utvrđivanja podobnosti uvezene robe za obavljanje djelatnosti korisnika povlastice.

Član 6.

Komisija daje prijedlog mišljenja o karakteru robe prema Odluci o listi obrazovnih, naučnih i kulturoloških materijala koji su oslobođeni od plaćanja carine („Službeni glasnik BiH“, broj: 34/05) i po uobičajenim privilegijama dogovorenim međunarodnim sporazumima i to: Sporazumom o uvozu predmeta prosvjetnog, naučnog i kulturnog karaktera (na osnovu Zakona o ratifikaciji Protokola uz Sporazum o uvozu predmeta prosvjetnog, znanstvenog i kulturnog karaktera – „Službeni list R BiH“, br. 2/92 i 13/94).

IV - Uslovi za izdavanje potvrde

Član 7.

Potvrda se izdaje na temelju zahtjeva za svaki predmet posebno, pod uslovima utvrđenim ovim pravilnikom.

Potvrda sadrži naziv i broj ministarstva, pravni osnov, predmet potvrde (naznaku ugovora, odnosno drugog odgovarajućeg dokumenta i tekst tog dokumenta kojim je usvojen projekt od strane Vlade Federacije Bosne i Hercegovine), naziv podnosioca zahtjeva, klauzulu o plaćanju federalne administrativne takse, potpis ministra i štambilj ministarstva.

Komisija je dužna voditi evidenciju izdatih potvrda sa slijedećim podacima:

5. Podnosilac zahtjeva
6. Predmet potvrde, redni broj i datum izdavanja potvrde
7. Broj ugovora-odluke kojim je usvojen projekt od strane Vlade Federacije

Bosne i Hercegovine.

Evidencija se vodi u posebnoj svesci, ovjerenoj brojem protokola ministarstva.

Član 8.

Potvrda se izdaje u slučaju da je projekat usvojen od strane Vlade Federacije Bosne i Hercegovine.

Komisija izdaje potvrdu za slučaj da se radi o projektima iz oblasti koje pokriva Ministarstvo: kulturno-historijsko naslijeđe, kultura, sport i mladi.

Član 9.

Podnosilac zahtjeva za izdavanje mišljenja, odnosno potvrde za korištenje carinske povlastice u postupku oslobađanja od plaćanja carine, ne plaća opštu taksu, u skladu sa članom 7. tačka 3. Zakona o federalnim upravnim taksama i tarifi federalnih upravnih taksi („Službene novine Federacije BiH“, br. 6/98 i 8/00).

V – Završne odredbe

Član 10.

Ovaj pravilnik stupa na snagu danom donošenja.

Član 11.

Stupanjem na snagu ovog pravilnika, prestaje da važi Pravilnik o postupku davanja mišljenja za korištenje carinske povlastice u postupku oslobađanja od plaćanja carine, broj: 01-16-255/07 od 24.1.2007. godine.

MINISTAR

Gavrilo Grahovac

Broj: 01-16-330/09
Sarajevo, 26.1.2009. godine